

Johann Joachim Janssen:

## **VAN VEEN: Löppt all tegen** – Rock up Platt

Kennen Ji neet? Daar lett sük licht wat an doon: An 23. September treden se up in Leer in d' Kulturspieker, un 't sall ok nix kösten. Dat stimmt man blot halv, was ja ok neet in Rieg. Daarum: Keen Intree, man de Hood geiht rum. Un well't mooi funn, dat Kunzert, de kann denn ok futt de neje, de eerste Spiegelplaat kopen: „Löppt all tegen“ heet de, un ik kunn d'r al maal rinhören. VAN VEEN giff dat siet 2009, do hebben Alfred Mindrup un Wolfgang Frühling al meent, dat Platt un Rock bi-nanner hören. Un as 2012 ok noch Enno Finke un Mark Thomas d'rbi kwammen, kunnt't würkelk los gahn: 2013 de eersten Kunzerten tüsken Ollenbörg un Noordseeküst. Hör egen Texten un egen Musik kwamm good an bi de Tohörers, un mennigeen froog denn ok na'n Spiegelplaat. „Hebben wi nich“, muss denn alltied de Anwoord wesen. Spietelk! Man dat is nu anners worden. „Löppt all tegen“ is daar!

Mooi, dat se't maakt hebben! (Dat was de positive Bös-kupp.) Na hör egen Woorden hebben se versöcht, so dicht as mögelk bi'n Live-Situation to blieven. Un so hebben se an „blot twee Avenden“ de Lieder upnomen un ok neet mehr vööl an warkt. Un dat is dat, (nu kummt de Kritik): Dat is to marken. Un nett as bi'n Vertellsel, de bi't Vörlesen so good ankummt – bi't Lesen tohuus in d' Höörn bi't Fүүr is dat verannert, minner mooi mitmaal. Of bi Wien, de ik ut Frankriek mitbrenge, de lecker Wien is mitmaal bi

uns tohuus lang neet mehr so smakelk. Dat heet: Anner Maal doch 'n bietje mehr in 't Studio overarbeiten! Nu to de Texten. De fallen mi to: So to'n Bispill En Strophe ut „**Trina**“

Sünnschien in Määrt un Regen in Mai, un du stunnst alleen an d' Börkumkai. Dat Schipp gung up Fahrt un du bleevst daar ... De Sömmer was heet, un wi weren jung, de Nachten so lang, uns Leven bunt ... Daar spöört een: De Jungs weten, waar se van vertellen. Ok bi „**Gauer as du denkst**“:

Se harr lang Haar un so mooi blau Ogen. Se was an 't Schellen, hör Fründ harr woll weer logen. Du nammst hör in d' Arm un kunnst hör good verstahn. Sietdeem is se bi di un will ok nich mehr gahn. Dat kummt gau, gauer as du denkst ... Anners bi sitt dat bi Texten, de sük mit de grote Politik un dat Elend in de Welt befaaten. So as in „**Raketen**“

Se proten van Raketen, de begrenzt vernichten, wo effektiv Landminen Schaa anrichten. Wat'n Weekziel is, gien Proot van Leven! ... Is dat good? Is dat Platt? Willen Ji'n Antwoord? Nee, hööv't neet. Man tolest: Klook, dat VAN VEEN dat Bookje to de Spiegelplaat van 't Plattdүүtskbüro hett dörkieken laten. – Wi sehn uns an d' 23! ■